

由水往援樊龍適薛來衍提兵二千欲進茜草壩劄於王禪山而寅前騎適至四面蹙之來衍同曹守爵袁可成郭思正揮部下死戰憑高奮擊殺賊六百餘人寅怒甚正欲再闖聞崇明敗衄乃舍重慶徑歸而拜偽大將宋武屯茜草壩以為聲援孝廉胡縝與劉養鯤用間招出閔侍孔秦國俸等數十人恢復納谿嗣後宋武張令咸願納款密約擒酋為報比偽相何若海出行軍於酒間縛之來獻至六月初一日巡下南王大叅張給諫率兵同郭司李入瀘州發兵渡河與賊戰盡燒其營賊始遁去偽總兵朱國恩在合江被袁整袁墨等起兵暗襲星夜逃歸周鼎大敗於重慶走避合江民間為該縣把總詹君泰所得自後二逆只於穴中恣意衝突不敢據州縣矣